

# Danunder deriva il persunal da tgira igl avegnir?

La casa da tgira Puntreis a Mustér ei stada occupada fetg bein igl onn 2019

DA HANS HUONDER/FMR

■ **In dils grond problems che fatschenta il mument las casas da tgira ei la recrutaziun da persunal da tgira.** Da quel tema fetg actual sefatschenta il meinafatschenta da Puntreis, *Diego Deplazes*, il rapport annual dall'istituziun. Il menaschi da Puntreis ei seplegaus igl onn vargau en ina rama normala. Cussadentas e cussadents ein stai el center dalla lavor quotidiana. «Ord vesta dil meinafatschenta e dil menaschi operativ vul quei denton buca dir che tut ei stau senza sfidas el mingadi. In grond tema ei la demografia en nossas valladas. L'occupaziun da nossas casas da tgira entras cussadentas e cussadents ei per franc buna ils proxims onns – meins legrevla ei la damonda tgi che tgira nossas cussadentas e nos cussadents. Saver occupar las plazzas libras, surtut el secur da tgira, ei ina sfida permanenta», puntuescha Deplazes.

## Demografia fa quitaus

«Ils proxims onns vegnan pli pauc giuvenils ord scola e tuttas branschas combatan per bunas emprendistas ed emprendists motivai. Persunal dil fatg qualifieu ch'ei prompts da viver e luvrar ella periferia fatschenta e vegn a fatschentar nus buca mo sil secur da sanadad, mobein en general. Per quei motiv savein nus buca sefocussulemtein sils giuvenils che bandunan la scola, mobein stuein esser attents tier persunas che vulan midar mistregn e ch'enqueran ina occupaziun che dat satisfaziun e senn ella veta professionala», constatuescha Deplazes che sesa era sco deputau pil cumin dalla Cadi el Cussegl grond. Ina premissa per che quei reusseschi seigien bunas ed attractivas cundiziuns da lavor: «La puseviltad da planisar la carriera, il svilutp dalla concluvrera e dil concluvrer, bu-

nas cundiziuns da lavor, cumpatibladad denter famiglia e lavor ein mo entgins cavazzins che fatschentan il management.» Per empruar da migliurar la situaziun han l'Associaziun grischuna dallas casas da tgira en collaboraziun culla Federaziun grischuna da spitez intziuu ina campagna da reputaziun che cuoza ils proxims treis onns. El rom da quella vegen arranschau differentas acziuns. Dalla problematica sefatschenta dil reinvent era la politica cantunala. La finamira ei da promover e sviluppar il provediment da sanadad decenral, animond tuts pertuccai ellas regiuns da cooperar.

Ella medema direenziun van era entgins patrats dil president dil cussegl d'administraziun da Puntreis, *André Schmid* da Sedrun: «Igl avegnir vegen ei ad esser da grond'impurtonza d'anflar soluziuns, las qualas garanteschon en survetsch cumplesiv sigl entir secur da sanadad. Denter las persunas dil fatg sesanflan era ils medics che contonschan proximamein ni han per part gia contonschiu il temps da pensiu. Mo sch'ei reussescha a nus da mantener

tuttas structuras impurtontas, ella quantad e qualitat pretendida, vegenin nus a restar attractiv sco regiun en tuttas fasas dalla vegliadegna, cunzun suenter il temps da pensiu.» La gronda part dallas cussadentas e dils cussadents da Puntreis – bieben 50 – deriva da Sursassiala. Entgins da Sumvitg e Breil e singuls d'ordeifer. Igl onn 2019 ei la casa stada occupada cumpleinmeins. 43 cussadentas e cussadents han ina vegliadegna sur 80 onns, 20 da quei schizun ina tala sur 89 onns. Puntreis porscha 64 plazzas da lavor cumpleinas. 45,5 da quellas ein en favur dalla tgira. 71 pertschien dalla lavor prestada ella casa ei lu era occupaziun da tgira. L'istituziun ha fatg igl onn 2019 ina sviulta da 6,6 milliuns francs.

Il resultat da menaschi munta bieben in miez milliun francs, il resultat annual pressapauc 860'000 francs. Dil cussegl da fundaziun da Puntreis che vegen presidiuas da *Christoph Berger* da Mustér ei *Carmelia Bundi-Jacomet* da Curaglia seretratga igl onn vargau. Ella ei vegnida remplazzada da *Claudia Pally-Lutz* da Platta.



La casa da tgira Puntreis cun in bien onn da fatschenta.

FOTO H. HUONDER

## Treis damondas a Diego Deplazes

**FMR: Tgei fa Puntreis per empruar da sliugar il problem d'anflar persunal da tgira?**

**Diego Deplazes:** Ei dat buca in recept fix, pertgei il marcau da collaboraturu(e)s sil secur da tgira ei satels ed ellas regiuns periferas ei quei aunc pli marcant. Ina mesira che nus savein



prender ei da tener nies persunal che lavora tier nus e porscher bunas cundiziuns da lavor e la puseviltad da secolar.

Tier nus san ins absolver scolaziuns naven dalla gidontra da tgira entochen la persuna da tgira cun diplom da scola specialisada superiura. Plinavon sustenin nus per exempel dunnas cun famiglia per ch'ellas sappien metter sut in tetg famiglia e lavor; quei cun sustener finanziamein in plaz ella canorta ni cun organiser pli flexibel ils dils da lavor. En nosa branscha eis ei bein pusevuel da luvrar parzialmeins, e quei ei segir era in plus.

**El rapport annual tematisais Yus era la puseviltad d'activar gliend che vul midar clamada. Tgei premissas drova ei per ina tala midada?**

Persunas che lavuran bugen cun carstgauns, che han las competenzas socialas e la prontmad da survir e tgirar in concarstgaun han bunas premissas per far il pass el secur dalla tgira a liung temps. Tier in discours communale vegen allura era mirau tgei finamiras che la persuna interessada ha e tgei scolaziuns ch'ella ha previu d'absolver. El secur da tgira dat ei different levels da scolaziun e perfecziunament, e cheu san ins s'integrar e planisar bein ina carriera.

**Ei para sco sch'ei fuss pli sempel d'engaschar gliend dilg exterior per la tgira. Fuss quei ina via pli semplice ni ei quei buca sliugiu il problem?**

Tier mei setschenta buca la damonda, sche quei ei ina via pli semplice ni buca. Sch'il manco da persunal ei acuts ed a cuorta vesta, sa quei segir esser en'opziun. Jeu sun era dil meini ch'ei fa bein al menaschi sch'ins ha persunal d'autras regiuns ni d'autras naziuns che sa dar in l'autoimpuls.

A liunga vesta stuein nus denton sliugar il problem ell'atgna tiara e secolar il persunal necessari. Per quei motiv fa noss'associaziun dallas casas da tgira dil cantun Grischun ensemen cun la Spitez dil Grischun ina campagna d'image per mussar con interessanta che la lavor ella tgira a liung temps ei e tgei bunas perspectivas che nus savein porscher en nosa branscha.